


尚書地理今釋





叢書集成
初編

主編者
王雲五

商務印書館發行



尚書地理今釋



3 0646 4558 7

蔣廷錫撰


本館叢書集成初編所選借月
山房彙鈔澤古齋重鈔及指海
皆收有此書且同一版本借月
最早故據以影印

083
112
2:3045

尚書地理今釋

常熟

蔣廷錫揚



虞書

堯典

嶠夷

今朝鮮地

按孔安國傳東表之地稱嶠夷正

義曰青州在東界外之畔為表故云東表之地禹貢

雖指援据後漢書以嶠夷為朝鮮地蓋朝鮮古屬青

州與山東登州府隔海相對正合孔傳東表之語薛

季宣書古文訓謂嶠夷海嶠諸夷今登州于欽齊乘

又指爲海寧州非也

南交 今安南國林之奇尚書解云南交卽南趾也史記五帝本紀曰黃帝之地北至于幽陵南至于交趾則交趾之對幽都其來尚矣

西朔方 按史記五帝紀注徐廣曰西者今天水之

西縣漢屬隴西郡非也西縣秦置在今陝西鞏昌府秦州

界非以和仲宅西而名西之不可爲西縣猶朔方之不可爲朔方郡皆不當專指一處黃度尚書說云禹貢西被流沙自流沙以西皆夷界山川不紀於職方

故稱西以見境域之不止此也朔則不限沙漠茫茫
悠遠山川不可見故稱朔方以爲大界或曰山海經
北荒有幽都山樂史寰宇記幽州有幽都山皆爲附
會此記良是

媯 洹 在今山西平陽府蒲州界 按孔安國傳云
舜所居媯水之洹經典釋文云洹水之內也皆不以
洹爲水名而水經注云歷山有舜井媯水出焉南曰
媯水北曰洹水異源同歸渾流南入于河史記正義
亦引地記云河東郡青山山中有二泉南流者曰

媯水北流者曰泃水今考山西平陽府蒲州南有媯
泃二水皆南注大河與水經注地記二書合蓋泃本
訓北訓內又爲小水入大水之名或後人見媯水北
有一小水入媯遂蒙堯典文而加名耳

舜典

岱宗 魯頌作泰山周禮作岱山在今山東濟南府泰
安州北五里

南嶽 周禮作衡山山海經作岵嶽山在今湖廣衡州
府衡山縣西北三十里接衡陽縣及長沙府界

西嶽 禹貢作太華周禮作華山在今陝西西安府華陰縣南十里

北嶽 禹貢作恒山漢避文帝諱改常山在今山西大

同府渾源州南二十里接直隸正定府界 按恒山

自班固漢志載于上曲陽今正定府曲陽縣酈道元水經注

以下咸宗之然今曲陽縣治去山趾一百四十里不

若渾源之近

本朝釐正祀典祠恒山於渾源州當主渾源爲是

幽洲 按說文洲通作州括地志云故冀地在檀州燕

樂縣界今順天府密雲縣東北塞外地故老傳云舜流共工幽州居

此城

崇山 在今湖廣永定衛西大庸所東

三苗 今湖廣武昌岳州二府江西九江府地史記正

義曰吳起云三苗之國左洞庭而右彭蠡今江州鄂

州岳州也

三危 在今陝西嘉峪關外廢沙州衛界括地志云山

有三峯故曰三危俗亦名卑羽山在沙州敦煌縣東

南三十里

按蔡傳云三危西裔之地即禹貢所謂三危既宅者是矣若導川黑水所經之三危

自在大河之南與此
為二詳禹貢三危下

羽山 在今山東兗州府沂水東南一百里接郟城縣
及江南淮安府海州贛榆縣界

大禹謨

歷山 在今山西平陽府蒲州南三十里即禹貢雷首
山也水經注云河東郡南有歷山謂之歷觀舜所耕
處

益稷

塗山 在今江南鳳陽府懷遠縣東南八里孔穎達正

義曰哀七年左傳禹會諸侯于塗山杜預云塗山在壽春縣東北塗山國蓋近彼山也

夏書

禹貢

諸篇地名皆依經文編次禹貢山川有一名再見或三見者若依例編敘未免重複混淆

今將九州疆域山原川澤羌夷各以類次焉

九州

冀州 今山西之太原平陽汾州潞安大同五府澤遼

沁三州直隸之順天永平保定廣平順德宣化六府

及正定河間二府西北境大名府滑縣西境 盛京

之錦州府河南之懷慶衛輝彰德三府其北直抵塞
外陰山下西起東受降城今蒙古名薩爾兀村之北東訖于大
遼水也

兗州 今山東之東昌府及兗州曹州陽穀壽張鄆城
三縣濟南青州二府西北境直隸之大名府及真定
河間二府東南境河南之衛輝府考城縣也

青州 今山東之登州萊州二府青州府益都臨淄昌
樂安邱壽光臨朐六縣及諸城高苑博興樂安四縣
南境濟南府肥城長清歷城章邱鄒平長山新城淄

川八縣及泰安府萊蕪縣北境兗州府東阿平陰二縣北境其東北跨海爲盛京之奉天府訖於朝鮮國也按孔傳云東北據海實據有遼東之地孔氏之言是也蔡氏謂東北至海者非

徐州 今江南之徐州及鳳陽府懷遠五河虹靈壁四縣泗宿二州淮安府桃源清河安東宿遷睢寧贛榆六縣邳海二州山東之兗州府滋陽曲阜寧陽泗水金鄉魚臺嘉祥鉅野汶上鄒城鄒滕嶧費十四縣及平陰縣南境濟寧東平沂三州濟南府新泰縣及萊

蕪縣泰安州南境青州府莒州蒙陰沂水日照三縣
及諸城縣南境也

揚州 今江南之江寧揚州廬州安慶池州太平寧國
徽州鎮江常州蘇州松江十二府滁和廣德三州鳳
陽府鳳陽臨淮定遠霍邱盱眙天長六縣壽州淮安
府山陽鹽城二縣河南之汝寧府光山固始二縣光
州湖廣之黃州府羅田蘄水廣濟黃梅四縣蘄州廣
東之潮州府及浙江江西福建皆是也

荊州 今湖廣之武昌漢陽安陸荊州岳州長沙衡州

常德辰州寶慶永州十一府郴靖二州施州衛及襄陽府南漳縣德安府安陸雲夢孝感應城應山五縣隨州南境黃州府黃岡麻城黃陂黃安四縣四川之夔州府建始縣廣西之桂林府全州及興安縣越城嶺北嶺也

豫州 今河南之河南開封歸德南陽汝寧五府汝州直隸之大名府東明長垣二縣山東之曹州府定陶武城曹單四縣江南之鳳陽府潁亳二州潁上太和蒙城三縣湖廣之襄陽府襄陽光化宜城棗陽穀城

五縣均州鄖陽府鄖保康二縣及鄖西縣東境德安府隨州北境也

梁州 今陝西之漢中府興安州及西安府商州維南山陽鎮安商南四縣鞏昌府兩當鳳文成四縣徽階二州湖廣之鄖陽府房竹山竹溪三縣及鄖西縣西境四川之成都保寧順慶龍安馬湖五府潼川嘉定邛眉雅五州及敘州重慶夔州三府瀘州江北諸州縣松潘建昌二衛疊溪營黎大所天全六番招討司是也

雍州 今陝西之臨洮平涼慶陽延安鳳翔五府西安
府長安咸寧咸陽興平臨潼高陵鄠藍田涇陽三原
盩厔渭南富平醴泉朝邑郃陽澄城白水韓城華陰
蒲城同官武功永壽三水淳化長武二十七縣同華
耀乾邠五州鞏昌府隴西安定會寧通渭寧遠伏羌
西和秦安清水漳禮十一縣秦州及榆林寧夏寧州
中靖遠岷州洮州甘州莊浪諸衛所其在化外者南
至西傾積石西踰三危北抵沙漠皆是也

山原附

壺口 今山西平陽吉州西南七十里。有壺口山，黃河之水注其中，如壺然。

梁岐 今孔傳梁岐在雍州，今陝西西安府韓城縣

西北九十里之梁山，鳳翔府岐山縣東北四十里之

岐山也。

岐山一名天柱山，山南爲周原，詩所謂周原膻膻也。

蔡傳疑雍州之山

不當載于冀州，指今山西汾州府永寧州東北之呂

梁山，一名骨脊山者爲梁山，汾州府孝義縣西之狐

岐山，一名薛頡山者爲岐山，然二山去河甚遠，不得

謂河水所經，曾收云壺口梁岐一役也，其施功皆同。

時不可分言於二州故并言於冀得此可釋蔡氏之疑

岳陽 太岳一名霍太山今爲中鎮在山西平陽府霍州東三十里山周二百餘里南接岳陽趙城二縣北接靈石縣東接沁源縣界 案岳陽所該者廣蔡氏專指岳陽一縣非是

碣石 案漢書地理志云大碣石山在右北平郡驅城西南武帝紀注文穎云碣石在遼西繁縣繁縣今罷入臨榆此石著海旁蓋驅城卽今直隸永平府樂亭

縣案縣卽今昌黎縣二縣壤地連接杳無碣石踪跡而海水蕩滅之說又荒誕不可信考肇域志云山東濟南府海豐縣有馬谷山卽古碣石劉文偉亦以馬谷山在古九河之下合於禹貢入河入海之文斷爲碣石無疑近世論碣石者惟此說庶幾近之

明劉文偉云禹

貢敘碣石有入河入海之文其在九河之末入海之口明矣今九河故道俱在德棣之間碣石不當復在他境況地勢北高南下北平高地河水奚由而達耶馬谷山旣在九河之下而又巍然獨出于海濱其爲碣石無疑

蒙 蒙山在今山東青州府蒙陰縣南八里西南接堯

州費縣界延袤一百餘里

嶧陽 嶧陽一名葛嶧山在今江南淮安府邳州西南俗名距山以與沂水相距也

岷 岷山跨古雍梁二州自陝西鞏昌府岷州衛以西大山重谷谿谷起伏西南走蠻箐中直抵四川成都府之西境凡茂州之雪嶺灌縣之青城皆其支脈而導江之處則在今松潘衛北西番界之浪架嶺漢書地理志所云岷山在湔氐道西徼外是也

嶓 嶓冢有二一在陝西漢中府寧羌州北九十里東

漢水所出卽導漾之嶓冢一在鞏昌府秦州西南六十里西

漢水所出二山南北相去三四百里而支脈隱然聯屬郡縣志所謂隴東之山皆嶓冢是也

蔡山宋葉少蘊謂卽周公山在今四川雅州東五里

蒙山在今雅州名山縣西五里接雅州及蘆山縣界

西傾山一名強臺山在今陝西鞏昌府洮州衛西番界延袤千里外跨諸羌

荆 荆山在今陝西西安府富平縣西南十里下有荆

渠

卽北條之荆

終南 終南山在今陝西西安府長安縣南五十里東

至藍田縣西至鳳翔府郿縣綿亘八百餘里

惇物 惇物山漢書地理志右扶風武功縣注太壹山

古文以爲終南垂山古文以爲惇物皆在縣東武功

今陝西鳳翔府郿縣考圖志不載是山胡渭禹貢錐

指以爲太一之北峯在縣東四十里者是也

鳥鼠 鳥鼠山在今陝西臨洮府渭源縣西二十里

三危 三危山在大河南今陝西岷州衛塞外古疊州

西西番界疊雲南麗江府北河圖括地象云三危在

烏鼠西南與汝山相接黑水出其南鄭元云南當岷

山在積石西南是也今雲南大理府雲龍州西有三

崇山一名三危瀾滄江經其麓

有黑水祠或以為卽古三危也 按黑水卽今之瀾

滄江若以三危在麗江府北似乎太遠雲龍州之說

積石 積石山在今河州北一百二十里水經注謂之

唐迷山括地志云山勢峭拔下臨黃河其西五十里有積石關唐置

積石軍於此山海經云積石山在金城河門關西南

境中

漢之河關縣今之河州

杜佑通典云禹施功自積石山而

東今西平郡龍支縣

今西寧衛地與河州接界

界山是也

案諸

家言積石者多以此爲小積石別有大積石去此尚

千餘里其說蓋本於漢書西域傳謂河源出于闐北

流與蔥嶺河合東注蒲昌海潛行地下南出于積石

爲中國河之文其實禹施功之始卽此積石更無所

謂大積石也歐陽忞輿地廣記云班固所載張騫窮

河源事乃意度之非實見蒲昌海與積石通流其言

甚正蓋河源在吐蕃境漢時吐蕃未通中國武帝以

于闐山出玉按古圖書乃名河所出山爲崑崙後人

遂并積石亦失其實耳

于闐東流之水古名玉河蔥嶺水名新頭河見法顯佛

國記總與河源無涉

至水經并云積石在蔥嶺之北則又失之

遠矣或議杜佑主龍支之積石謂因唐置積石軍於

澆河故城而誤考後漢書郡國志隴西郡河關縣積

石山在西南又桓帝紀燒當羌叛段熲追擊於積石

注卽禹貢導河積石在鄯州龍支縣南是河州積石

之名非始於唐矣蔡氏據杜氏說釋經最當

龍門 龍門山在今陝西西安府韓城縣東北五十里

大河之西東與壺口隔水相望

崑崙 崑崙山在今西番界有三山一名阿克坦齊禽

一名巴爾布哈一名巴顏喀拉總名枯爾坤譯言崑

崙也在積石之西河源所出 按漢書地理志金城

郡臨羌縣西北至塞外有西王母石室西有弱水崑

崙山祠此蔡傳所據以爲崑崙在臨羌者也然漢志

言西有崑崙山祠非言山在縣界漢臨羌縣在今陝

西西寧衛西崑崙山不啻若是之近通典云吐蕃自

云崑崙山在國中西南河之所出唐書吐蕃傳云劉

元鼎使還言自湟水入河處西南行二千三百里有
紫山直大羊同國古所謂崑崙蕃曰悶磨黎山東距
長安五十里河源其間元史附錄河源云吐蕃朶甘
思東北有大雪山名亦耳麻不莫刺其山最高譯言
騰乞里塔卽崑崙也按雪山今名爾托灰山在崑崙
之東諸水所合諸源滙流經其
下非卽崑崙也元史誤又按此崑崙山乃河水伏
流發見之地非四大水發源之崑崙也互詳黑水案
下

岍 岍山漢書地理志名吳山在今陝西鳳翔府隴州
南八十里

雷首 雷首山括地志云此山西起雷首東至吳坂長

數百里隨地異名通典云雷首在河東縣

今山西蒲州此

山凡有八名歷山首陽山蒲山襄山甘棗山中條山

渠豬山獨頭山也互見前歷山下

底柱 底柱山在今河南河南府陝州東四十里大河

中西北去山西平陽府平陸縣五十里

析城 析城山在今山西澤州陽城縣西南七十里

王屋 王屋山在今河南懷慶府濟源縣西北九十里

接山西平陽府垣曲縣及澤州陽城縣界山有三重

其狀如屋

太行 太行山延袤千餘里起於河南懷慶府濟源縣
迤西東北跨山西河南直隸界

朱圉 朱圉山在今陝西鞏昌府伏羌縣西南三十里

熊耳 熊耳山在今河南河南府盧氏縣西南七十里

接陝西西安府商州晉上洛縣界熊耳雖有東西異名其

實一山故郭璞云在上洛班固云在盧氏蔡傳以班

固爲非非也

外方 今中嶽嵩山在河南河南府登封縣北十里西

接洛陽縣北接鞏縣東接開封府密縣界綿亘一百五十里

桐柏 桐柏山在今河南南陽府桐柏縣東一里東南接湖廣德安府隨州西接襄陽府襄陽縣界

陪尾 陪尾山在今山東兗州府泗水縣東五十里

案孔傳云淮出桐柏經陪尾今德安府安陸縣北有橫山漢志所謂橫尾山古文以爲陪尾者也淮水不經此山下吳澄書纂言曰唐志泗水縣有陪尾山泗水出焉蓋此是也以橫尾爲陪尾者非是互見泗水

下

荆山 在今湖廣襄陽府南漳縣西少北八十里左傳
荆山九州之險指此

內方 內方山在今湖廣安陸府鍾祥縣西周迴百餘
里接荆門州界

大別 大別山一名魯山在今漢陽府漢陽縣東北平
里漢水西岸

敷淺原 案朱子九江彭蠡辨云敷淺原說者以爲漢
歷陵縣之博陽山在今江州德安縣爲山甚小而庠

不足以有所表見而其全體正脈遂起而爲廬阜則甚高且大以盡乎大江彭蠡之交而所以識夫衡山東過一支之所極者唯是爲宜耳蔡傳遵用師說指廬阜爲敷淺原而復以無可考據爲疑何也廬阜在今江西九江府德化縣南山北隸南康府星子縣合黎 合黎山亦名要塗山在今陝西甘州衛西北四十里綿延而西接高臺鎮彝二所界

大伾詳大伾山亦名黎山在今直隸大名府濬縣東南二里周五里

東陵 卽巴邱山一名天岳山臨大江今湖廣岳州府城是其遺址

太原 案孔傳高平曰太原今以爲郡名正義曰卽晉陽縣也唐之晉陽縣今山西太原縣是東北去太原府治四十里蔡傳以爲今河東路太原府者亦統同言之也

覃懷 今河南懷慶府地通典云懷州禹貢覃懷之地是也

東原 東原今山東兗州府東平州及濟南府泰安州

之西南境也

陶邱 在今山東兗州府定陶縣西南七里

川 澤附

衡漳 清漳水出今山西太原府樂平縣西南三十里

沾嶺水經注所謂少山大鼃谷也東南流至河南彰

德府涉縣交漳口會濁漳水又東北流入直隸界至

廣平縣分二支一支東行入衛河一支爲經流東北

行經山東邱縣界復分二支一支北行入大陸澤一

支爲經流東北行經直隸清河阜城交河至青縣合

衛河北流至天津西沽合桑乾諸水東行入海所謂老漳河也其一支入大陸者亦東北行至天津西沽合諸水入海所謂新漳河也濁漳水出今山西潞安府長子縣西五十里發鳩山亦東南流至交漳口會清漳

恒 恒水一名長溪源出恒山自直隸正定府阜平縣龍泉關北迤邐流經大派山爲大派水亦曰沙水又東南至保定府邢州界合滋河入於唐水唐水卽滏水也

衛 衛水今名雷溝河出正定府靈壽縣良司村南流

至縣東南入滹沱河

九河 案孔穎達九河疏徒駭在成平胡蘇在東光鬲

津在鬲縣此祖漢許商徒駭最北鬲津最南之言也

其餘六者復據爾雅九河之次謂太史馬頰覆釜在

東光之北成平之南簡絜鉤盤在東光之南鬲縣之

北蔡傳以太史河不如所在又合簡絜為一與孔疏

異按陸德明經典釋文分簡絜為二朱子今考直隸

孟子集注因之蔡傳合簡絜為一非是

河間府滄州自唐迄元滄州治清池縣之西交河縣漢成平縣之東北

六十里有徒駭河漢書地理志所謂滹沱河民曰徒駭河是也山東濟南府平原縣北有篤馬河南北經陵縣德平商河隋唐爲滹沱河縣樂陵諸縣界其流或斷或續相傳卽馬煩河也濟南府德州有覆釜河東北至海豐縣入海河間府東光縣東南有胡蘇河東經寧津縣唐臨滄州漢饒安縣在州東南慶雲縣隋唐爲無棣縣界至海豐縣入海河間府南皮縣城外有簡河絜河二河相去最近濟南府樂陵縣東南有鉤盤河自平原德平二縣界流入至海豐縣東入海德州西南有鬲津河東經

吳橋寧津德平樂陵慶雲諸縣界至海豐縣大沽口
入海其太史河據齊乘在清滄二州之間明一統志
亦云在南皮縣北今其地雖無顯迹然以孔疏參之
明一統志亦非無據蓋九河故道自春秋時已湮廢
遷徙漢唐以來諸儒訪求古跡就所見之斷港絕潢
指爲某河某河似乎是非不可知然河自大陸以北
順勢下趨禹時九河自當在德州以上河間數百里
之地考之於古驗之於今是亦可信也已

澗 沮 案元和志澗水沮水俱出濮州雷澤縣西北

平地去縣四十里九域志濮州有沮溝卽禹貢灑沮
會同是也宋時河決曹濮間灑沮之源適當其衝久
而泥滓填淤二水遂涸蔡傳乃欲以汜睢當之非是
韓汝節云汜睢在豫徐之境無預於兗州而兗州自
有灑沮也

灑 今山東東昌府朝城縣南有灑河陂廣十餘里又
青州府高苑縣北有灑河濟南府禹城縣西二里有
灑河一名河源俗又名土河東北入臨邑縣界案朝
城漢之東武陽縣高苑漢之千乘縣禹城漢之高唐

縣也蓋漯水本出高唐至千乘入海自禹導河至大

伾始分河之一支

史記禹斷二渠以引其河注其一則漯川東北流首經

東武陽至高唐合漯水自合漯水則高唐以南武陽

以北之河皆被以漯名矣故漢志於平原郡高唐注

則云漯水所出於東郡東武陽則云禹治漯水東北

至千乘入海疏解漯水源流固自瞭然蔡傳未究斯

旨又誤解程大昌此河乃漢河元非禹河之語竟不

知漯水所在善乎陳師凱書傳旁通曰程氏之意非

指漯爲漢河蓋言漯入河處所受河水乃漢以後所

徙頓邱之河非禹時澶相以北之河其深水仍以東武陽爲是也

濰 濰水出今山東青州府莒州西北九十里箕屋山卽濰山也土人名爲淮河東流逕諸城縣西折而北指萊州府昌邑縣東北五十里入海

淄 淄水出今青州府益都縣西南顏神鎮東南二十五里岳陽山卽原山也其山接濟南府章邱淄川萊蕪三縣淄水出於山之東谷東北流至青州府壽光縣北由清水泊入海禹時淄水入海不入濟水經注

敘述甚明史記河渠書亦云禹治水之後於齊則通
菑濟之間是二水不通可知蔡氏因漢書淄水入沛
一語云淄水東入濟非是

汶 汶水出今山東濟南府萊蕪縣其源非一合流於

泰安州之靜安鎮謂之大汶又有小汶出新泰縣宮

山之下至徂徠山南入大汶水經注有牟汶北汶柴

貢錐指云汶水有五北汶羸汶柴汶牟汶其一則經

流也羸汶在今萊蕪縣南三十里源出新泰縣宮山

之陰流合牟汶牟汶在萊蕪縣南門外西流至泰安

州東入汶北汶即泮水源出泰山分水嶺泰安州志

謂之壑汶柴汶在泰安州東三十五里俗名司馬河

又有水出萊蕪縣寨子村流合牟汶者近志指為涪

汶據漢志瑯邪靈門縣有高梁山涪水所出東北入
淮說文云水出靈門山世謂之涪汶在今莒州界與
萊蕪無涉志誤汶水舊由安民亭合濟水東北入海自明永

樂九年於東平州東六十里築戴村壩盡遏汶水出
南旺南北分流南流達於濟寧州會沂泗諸水入淮
者十之四北流達於臨清州會漳衛諸水入海者十
之六矣

沂 沂水出今山東沂州府沂水縣西一百七十里雕

崖山

鄭康成云沂水出沂山或云臨樂山酈道元云沂水出艾山禹貢錙指謂雕崖臨樂艾山皆沂

山沂阜之異名也

接蒙陰縣界南流至江南淮安府宿遷縣

北滙爲駱馬湖又南入運河

泗 泗水出今山東兗州府泗水縣東五十里陪尾山
四源並發故名西南流至兗州府城東金口壩分爲
二派一越壩西南流至濟寧州界爲泗河又西南至
魯橋入運河一從壩上西流至兗州府城西爲府河
又西南至濟南州東台泲水又西南至天井牖入運
河 案史記河渠書敘禹功畢迺云自是之後滎陽
下引河東南爲鴻溝以通宋鄭陳蔡曹衛與濟汝淮
泗會汜水爲鴻溝分流禹時所未有許慎所云乃周

漢以後水道不可爲禹時淮泗入河之證也蓋徐州貢道自淮入泗自泗入沛入漯以達河當在蒗澤以東若蒗澤以西沛水屢見屢伏與河無相通之理泗水安能達於河耶蔡氏所謂泗之上源自沛可以通河者亦未明晰

彭蠡 彭蠡湖在今江西南昌府城東北一百五十里饒州府城西四十里南康府城東五里九江府城東南九十里上承章貢諸水與江水相吞吐周迴四百五十里亦曰鄱陽湖者以中有鄱陽山而名俗又稱

在都昌縣者爲東鄱湖在南昌縣者爲西鄱湖

三江 案三江孔安國班固鄭康成韋昭桑欽郭璞顧夷諸說不一惟鄭康成曰左合漢爲北江右合彭蠡爲南江岷江居其中則爲中江故書稱東爲中江者明岷江至彭蠡與南北合始得稱中也融洽前後經文確不可易宋蘇軾實宗其說蔡傳專主庾仲初吳都賦注取松江婁江東江爲三江力排蘇說且曰大江合漢與彭蠡之後又千餘里而入海不復可指爲三不知三江云者因上流有中江北江南江而言之

非截然指爲三也蔡傳又云禹貢無施勞者雖大亦
畧揚州大江無俟濬治故在不書不知禹貢所紀皆
成功而施功卽在其中當洪水泛濫之後大江自彭
蠡以東至入海處其間豈無泥沙壅塞謂之無施勞
可乎况管子荀子淮南子皆云禹疏三江可證也

又按經文敘漢水入江之後又必敘其東匯澤爲彭
蠡東爲北江入于海者江漢勢均力敵漢水雖與江
水會合爲一亦必窮其下流以至入海也鄭樵衍文
之說朱子嘗從之未敢以爲定論漢水入江而匯爲

彭蠡則漢亦爲江江亦爲漢非謂漢水入江之後七
百餘里獨橫截而南入於番陽也番陽合數州之流
豬而爲澤雖無仰於江漢而江漢東流乘勢而入朱
子固云地勢北高南下湖水爲江水所遏因郤而爲
豬安見漢江二水不可逆流而入彭蠡耶彭蠡在南
經文不云南匯而云東匯者就江漢大勢而言與下
文東爲北江東字並同至蔡氏泥於東匯北匯之文
欲以巢湖代彭蠡且謂官屬之往者未敢深入誤比
彭蠡於巢湖則詞更支離矣

震澤 卽太湖介於江南浙江之間今江南蘇州府之
吳吳江二縣常州府之武進無錫宜興三縣浙江湖
州府之烏程長興二縣皆其所分隸也

九江 卽洞庭湖在今湖廣岳州府巴陵縣西南北接
華容安鄉二縣西南接常德府龍陽縣東南接長沙
府湘陰縣界爲湖南衆水之匯 案漢書地理志廬
江郡尋陽縣禹貢九江在南皆東合爲大江蔡傳云
九江尋陽乃禹貢揚州之域不得以荊州之水當之
且導江經文過九江至于東陵東陵卽今巴陵

岳州府治

九江在巴陵之上其非尋陽可知山海經於洞庭之

山云澧沅瀟湘在九江之間水經云九江在長沙下

雋縣今武昌府通城崇陽二縣地西北至宋曾彥和以沅沅水出今貴州

黎平府生苗界俗名清水江東北漸出今湖廣常德府武陵縣東入

沅亦作澗出今湖廣辰州府沅陵縣入沅辰出今貴州銅仁府東北

敘一名渠江出今湖廣靖州西北入沅酉出今沅陵縣東入沅湘出今廣西桂林府興安縣東北

入湖資出今湖廣寶慶府武岡州東北入湘澧詳後水皆合洞庭中東

入於江是為九江蔡氏遵之朱子考定九江去濼澧

二水而易以瀟一名管水出今湖廣永寧府邵陽縣

界東注 大抵通儒皆主洞庭之說也
於湘

沱 案荆州之沱有二說漢書地理志云南郡枝江縣

今屬湖廣 江沱出西東入江顏師古曰沱即江別出
荆州府

者也水經云江水東逕上明城北注云其地夷敞北據

大江江汜枝分東入大江縣治洲上故以枝江為稱

是古枝江縣有沱水也今不可考又孔穎達正義引

鄭注云華容 漢華容縣今荆州府監利石首二縣地非今之岳州府華容縣也 有夏

水首出江尾入河此所謂沱也夏水自今荆州府江

陵縣東南首受江水曰中夏口經監利縣沔陽州界

入漢水以其冬涸夏流故名夏水其在梁州者則今四川成都府郫縣沱江是江在縣北六里一名郫江至瀘州入大江其上流爲成都府灌縣蔡傳所謂永康軍導江縣也

潛 潛水一在今安陸府潛江縣東由蘆狀腦分流遶城東南一支通順河入沔陽州境今淤一支南流至拖船埠入漢水此荊州之潛也禹貢錐指曰韻會潛水伏流也荊州之潛雖不如龍門石穴之奇亦必漢水伏流徙平地滴出故謂之潛今漢水之分流者名

蓋洙宜取伏流之意以爲古潛水庶幾得之蓋禹時
本自伏流涌出復入於漢及乎後世通渠漢川雲夢
之際則開通上源以資舟楫之利禹跡遂不可知耳
一在今四川保寧府廣元縣亦名龍門水自朝天驛
北穿穴而出入嘉陵江此梁州之潛也郭璞爾雅音
義云有水從漢中沔陽縣南流至梓潼漢壽入大穴
中通峒山下西南潛出一名沔水舊俗云卽禹貢潛
也又四川順慶府渠縣東有潛水梁縣蔡傳所謂渠
州流江縣也

孔氏傳云荆梁二州各有沔潛但地勢
西高東下雖於梁州台流還從荆州台

出耳 案梁州之沱至瀘州入江而梁州之潛亦無
從荆州分出之理蓋荆州別有沱潛也孔說非是

伊 伊水出今河南河南府盧氏縣熊耳山縣志謂伊

嶺之陽者古熊耳盤基甚廣闊頓亦熊耳也至偃師縣南入洛

洛 洛水出今陝西西安府雒南縣冢嶺山至河南府

鞏縣東北入河

瀍 瀍水出今河南府洛陽縣西北穀城山至縣東入

洛

澗 澗水出今河南府澗池縣東北白石山至洛陽縣

西南入洛

滎波 卽滎澤在今河南開封府滎陽縣南三里古城
村 案孔安國傳云滎澤波水已成道豬正義曰鄭
云今塞爲平地滎陽民猶謂其處爲滎澤在其縣東
蓋濟水伏流地中絕河而南溢爲巨澤禹貢錐指云
案馬鄭王本波並作播伏生今文亦然孔安國解作
一水非二水以爲二水自顏師古始宋林之奇本之
引周職方豫州其川滎維其浸波滎爾雅水自洛出
爲波別滎波爲二水蔡氏因之然案圖究義以滎波
爲二水終無是處傅氏寅曰上文言導洛此則專主

導濟言不當又泛言洛之支水職方所記山川非治
水次第不必泥也山海經婁涿之山波水出於其陰
北流注於穀水今本作陂郭璞云世謂之百谷水非
屬波水證一惟酈注引作波然亦出於山不出於洛
非屬波水證二水經洛水又東門水出焉注云爾雅
所謂洛別爲波也惟此堪引然余考門水下流爲鴻
關水今謂之洪門堰在商州洛南縣東北至靈寶縣
而入河何曾見水豬爲澤乎非屬波水證三且職方
豫州之波出魯山縣鄭注謂卽滎播固非而洛南之

波水則與滎澤相距五六百里中隔大山豈可總撮而言之曰滎波既豬乎其說極詳引之以證林氏之失

黑水 案黑水之辨諸家紛如謹考地圖禹貢之黑水

有三正不必強合水經注所謂黑水出張掖雞山今甘

州至於燉煌今廢此雍州之黑水也漢書地理志隗

爲郡縣南廣注云汾關山符黑水所出南廣今北至

夔道入江州今敘唐樊綽亦以麗江爲古黑水云羅些

城北有三危山羅些城在今其山從山南行上流出

土番界薛季宣謂瀘水爲黑水

今打冲河

引酈道元說黑

水亦曰瀘水卽若水出姚州徼外土番界中山海經

黑水之間有若水是也以麗江之說爲非不知打冲

河至大姚縣卽合金沙江會流入岷江薛氏之說原

與漢志相合此梁州之黑水也宋程大昌以瀾滄江

爲黑水李元陽黑水辨亦云隴蜀無入南海之水唯

滇之瀾滄足以當之而元史載勸農官張立道使交

趾並黑水以至其國吳任臣山海經注亦以瀾滄爲

古黑水此導川之黑水也蓋雍州之黑水其源在黃

河之北梁州及導川之黑水其源皆在黃河之南有
截然不相紊者第以張掖燉煌尚在內地可以尋源
而求而推其委而不得遂托爲越河伏流之說夫崑
崙爲地軸其山根連延起頓包河內接秦隴直達長
安爲南山黑水自燉煌而南縱可越大河之伏流其
不能越河以南之南山也明矣若狃於雍州三危旣
宅之說謂三危黑水並在雍州域內不知道導川之三
危在大河之南非卽竄三苗之三危辨詳辭典
三危下而雍
州之黑水必非導川之黑水也又明矣然主瀟水麗

江瀾滄之說者亦皆以意度未能確指水之分合不知瀘水麗江源異而流同麗江瀾滄源同而流異分合言之梁州之黑水有兩支而與導川之黑水實出一源也而古未有及之者蓋以二水僻在番界隔蔽南山阻與從古未通中國卽魏之法顯唐之元奘元世祖之南征邱處機之西遊皆繞出崑崙以外歷西域諸國至於滇南總未嘗經其地但從入中國之支流以古今分域配之料約爲某水某水而已今四海大一統

皇上恩威所屆靡不霑被震懾郵傳所至迎將恐後

特命使臣遠歷西番究源討委寫圖以誌支派經絡瞭如指掌諸家浮說有所折衷矣謹將黑水同異分注於左

雍州黑水 出陝西甘肅塞外南流至河州入積石河

今俗名大通河是也

按括地志云黑水出伊川伊吾縣北東南流至鄯州又東南至

河州入黃河今黑水上源為流沙壅塞已無遺跡可考其下流為大通河在瓜州之南歷西寧衛東南至河州入河西寧即唐之鄯州則括地志之說與今圖合 又案河至積石北則大通河入之南則大夏河注之二水入河之口南北相值後人或遂指大夏為黑水黃河而南之跡不知大夏雖在黃河之南實仍

在南山之北且其源自南而北
與山南入海之水絕不相通

梁州黑水 卽今雲南之金沙江其源發於西番諾莫

暉五色什山分支之東曰阿克達母必拉南流至塔

城關入雲南麗江府境亦曰麗水 案麗水卽金沙江入岷江不入南海

唐樊綽云麗水入南海非東南流至姚安府大姚縣之左却鄉卽

却北打冲河自鹽井衛來會之 打冲河出自西番界在崑崙東南百里二

源同發名查褚必拉蒙古謂之七察兒哈那平地水泉數十泓沮洳繁沸散若列星匯而南流有支河于

二通左右流入之至占對按撫司入四川界南流東折繞鹽井營之東北入南至烏喇裸果入金沙江

又東入四川境逕會川營南又東至東川府西折而

東北流徑烏蒙府西北馬湖府南又東逕敘州府南
入岷

導川黑水 卽今雲南之瀾滄江其源發於西番諾莫

渾五巴什山分支之西曰阿克必拉南流至你那山

入雲南界東歧一支爲漾備江卽程大昌所謂葉榆河東南流

分注大理府之西洱海經流入順寧府境其正支南

行絕雲龍江而東南至雲州屬順寧府北之分水嶺仍與

漾備江合又南流至阿瓦國入南海楊慎丹錯錄云杜氏通典曰吐

蕃有可跋海去赤嶺百里方圓七十里東南流入西
洱河合流而東號曰漾瀛水又東南出會川爲盧水

焉盧水卽黑水也長寧周文安云三危山在雲南麗江府其源委旣詳足以補禹貢之注夫以漾溲爲黑水漾溲與瀾滄其源同其委亦同猶之可也若云東南山會川爲盧水會川在漾溲之北不得言東南況所謂盧水者乃金沙江可以爲梁州之黑水不可爲瀾川所云入於南海之黑水也又麗江府爲金沙江所經其地有三危山亦與漾溲無涉又案金沙瀾滄一爲梁州之黑水一爲瀾川之黑水然皆非四大水之黑水也昔人謂番名山川皆以形色西南夷地水色多黑故悉蒙黑名如打冲金沙瀾滄俱得稱黑水也而眞黑水之源去瀾滄之西三百餘里番名哈拉烏蘇色尙經蒙番怒彝猓界由緬甸入南海卽佛書所謂黑水山阿

耨達山

即大崑崙山在
今達賴喇嘛界

東是也禹跡之所不至蓋中

國在阿耨達之東故名震旦所入大水唯黃河一支

可見黑水出阿耨達之東實在中國之西南未嘗流

入內地故從古無人知其源委也

桓 桓水一名白水出今陝西岷州衛東南分水嶺至

四川保寧府昭化縣東入西漢水

西漢水出秦州嶓
冢山上流為犀牛

江下流為

嘉陵江

沔 沔水一名沮水漢書地理志武都郡沮縣沮水出

東狼谷沮縣即今陝西漢中府畧陽縣也東南至沔

縣西南入漢水名曰沮口

弱水

今陝西山丹衛

漢剛丹縣

城西有山丹河古弱水也

法顯佛國記謂之流沙河

出衛西南窮石山正流西至合黎山與

張掖河合又東北至甘州衛北迤邐流至塞外入居

延澤其餘波溢入流沙也

涇

涇水出今陝西平涼府平涼縣西南斧頭山亦名

崆峒山東至西安府高陵縣西南入渭水

渭

渭水出今陝西臨洮府渭源縣西烏鼠山東至西

安府華陰縣東北入河

汭 汭水出今平涼府華亭縣有二源北源出湫頭山之朝那湫南源出齊山至縣東與北河合又東至涇州西北入涇水

漆 漆水源出陝西西安府同官縣北高山流經縣城東合同官水西南至耀州屬西與沮水合

沮 沮水出陝西延安府中部縣西南流經宜君屬延

同官二縣境至耀州城南會漆水東南入富平縣屬西安界名石州河又南流至臨潼縣屬西北交口鎮入

渭水

澧水 源出今陝西西安府鄠縣東南終南山自紫閣

而下至咸陽縣東南入渭水

河 謹案地圖河出今西番枯爾坤山即崑崙山有三河名

孤爾班索爾馬俱東流合諸泉源元史所謂有泉百餘泓沮洳渙散弗

可逼視 查靈鄂模元史所謂火敦腦兒即星宿海也鄂靈鄂模元史所謂

者也 雁二巨澤名折而北經蒙古爾托灰山之南東南貫

阿刺腦見也 敖羅灰鄂模東南流巴爾堪河自西來注之又東流

南則巴里馬河敖魯喀河薩爾河呼呼烏蘇河拜圖

河巴里馬朱爾克河北則哈爾濟河圖聲圖河咸來

入之又北折而東流今崑都倫巴顏喀拉伊馬圖諸

河迤邐東北行歷歸德堡

元史作貴德州

經積石山至陝西

臨洮府河州入中國界過蘭州又折而東北經寧夏

衛流出塞外

河以內為河套地

又東南至延安府府谷縣入

塞

河以東為山西界

南流至潼關衛又折而東由河南山東

界至江南淮安府安東縣入海

孟津

即今河陽渡又名富平津在河南懷慶府孟縣

南十八里

降水

今本作降

水出今山西潞安府屯留縣西南八十

里盤秀嶺至潞安府潞城縣入濁漳水而濁漳水由是亦名降水矣 案降水卽漳河信都漳河遷徙無定故有枯澤之名蔡氏仍漢志之誤以枯澤渠爲禹時降水非也

漾 漢 漾水出今陝西漢中府寧羌州北嶠冢山東至漢中府南鄭縣西爲漢水亦名東漢水東流至白河縣入湖廣界又東流經鄖陽縣至均州又東南流歷光化穀城二縣至襄陽縣東津灣折而南流經鍾祥縣至潛江縣大漢口復東流經漢川縣至漢陽縣

漢口合岷江 案禹貢漢水今名東漢水源出陝西

漢中府 漢隴西郡 西縣嶓冢山接寧羌州界其出葭昌府

秦州 漢隴西郡氏道縣當在其地 嶓冢山者今名西漢水下流為

嘉陵江自班固誤解漢水東西二源水經注因之訛

謬至今莫能是正今考輿圖二水源流瞭如指掌可

破千古之迷惑矣

滄浪水 在今湖廣襄陽府均州北四十里

江 江水源出今四川松潘衛北西番界有三支正支

自浪架嶺 岷山之隨地異名者 南流東支自弓楨口至漳臘營

合正支西支自殺虎塘至黃勝關合正支南經茂州

威州汶川縣以至灌縣灘堆歧為數十股滂沱南下

左抱成都府西環崇慶州眾流以次會於新津縣南

又南行逕眉州嘉定州至敘州府東南合金沙江折

而東北流至重慶府嘉陵江發源陝西鳳翔府寶雞縣之大散嶺至鞏昌府

徽州合西漢水入四川界涪江發源松潘衛東雪欄山東南流至合州與嘉陵江會自北來

合流入之又東北經夔州府巫山縣入湖廣界東流

至彝陵州東南流至枝江縣又東流至荊州府折而

南流至石首縣又東流至監利縣又南流至岳州府

折而東北流至武昌府與漢江合又東流至黃州府
又東南流入江西界至湖口縣與南江合江即贛又東
北流入江南界經江寧府至揚州府通州入海

澧水 澧水出今湖廣永定衛西歷山至岳州府安鄉
縣南會赤沙河入洞庭湖

濟 濟水出今河南懷慶府濟源縣王屋山既見而伏
至濟源縣西北五里重源顯發有東西二池合流至
溫縣東南入河

沅 沅水即濟水之上流蔡傳所謂發源為沅既東為

濟是也

淮

淮水發源河南南陽府桐柏縣桐柏山

山下有淮井泉源所

出

水經云出胎簪山者即桐柏之支峯也東流至光

州東北會汝水

出河南汝寧府遂平縣西六十里洪山

又東由固始縣

入江南鳳陽府潁州界又東流至潁上縣東南淠水

入之又東北至懷遠縣合澗河又東徑長淮衛至五

河縣合澮河又東徑泗州城南盱眙城北漫衍入洪

澤湖東北出淮安府清河縣之清口與黃河會東則

刷黃河以入海南則入運河以濟漕歷揚州府寶應

縣高郵州抵江都縣入揚子江 案禹時江淮本不

相通自春秋時吳伐齊於廣陵城今揚州府東南作邗城

城下掘深溝謂之邗江東北通射陽湖屬淮安府山陽縣而

北至末口入淮此溝通淮江之故道也至晉永和

江都水斷乃於歐陽埭在江都縣西南引江至廣陵城而北

出白馬湖合中瀆入淮謂之山陽瀆隋時又開廣之

以通戰艦明初陳瑄循故瀆開新運河以通漕此即

今之運道也

大陸 大陸澤一名廣阿澤跨今直隸保定府束鹿縣

元和志大陸澤在深州鹿城縣南是也順德府鉅鹿縣元和志大陸澤

邢州鉅鹿縣西北五里是也案漢書河渠志禹之行河水本隨西山下東北去鉅鹿正在西之下自是

大河所經程大昌以為鉅鹿去河絕遠河未嘗逕邢以行非也真定府隆平縣通典

昭慶縣有大陸澤元和志廣阿澤寧晉縣明一統志

在趙州昭慶縣東二十五里是也通典深州陸澤縣禹貢大陸澤在

葫蘆河即大深州此元和志深州陸澤縣南三里即

大陸之上承滹沱溢陽漳唐諸河水匯為巨浸又東北流為新漳河至大城縣為子牙河至天津衛入海

雷夏 今山東東昌府濮州東南有雷澤接曹州界水

經注云雷澤在大成陽故城西北十餘里其陂東西

二十餘里南北十五里卽舜所漁也

大野

元和志云大野澤一名鉅野在鄆城鉅野縣今屬

山東兗州府

東五里南北三百里東西百餘里禹貢錐指

云鉅野屢遭河患自漢以來衝決填淤凡四五度高

下易形久已非禹跡之舊逮元至正四年河又決入

此地及河南徙澤遂涸為平陸而畔岸不可復識矣

元王樵云南旺湖卽大野澤案今南旺湖去鉅野縣一百餘里中隔嘉祥縣或大野未涸之時澤水流衍

至此理容有之王氏徑以南旺為大野非也

雲夢

漢書地理志云南郡華容縣

見前沱水注

雲夢澤在

南荊州數編縣今安陸府有雲夢宮又江夏郡西陵

縣今黃州府蘄州及黃岡麻城二縣有雲夢宮水經注云雲杜縣今

陸府京山縣東北有雲夢城又夏水東逕監利縣今屬荊州府

南縣土卑下澤多陂陁西南自州陵今安陸府東界

逕於雲杜沔陽今漢陽府漢陽縣為雲夢之藪杜預云枝江

縣今屬荊州府安陸縣今屬德安府有雲夢城蓋跨川且隰兼

包勢廣矣元和志云雲夢澤在安陸縣南五十里又

云雲夢澤在雲夢縣今屬德安府西七里然則東抵蘄州

西抵枝江京山以南青草以北皆為古之雲夢正義

謂雲夢一澤而每處有名者也

羅泌分雲夢為二澤非是

荷澤 荷澤古濟水所匯當在今山東兗州府曹州東

南及定陶縣界

孟豬

孟豬周禮作望諸史記作明都

澤今河南歸德府商邱虞城

二縣界有孟諸臺寰宇記云虞城孟豬澤俗呼為涓

臺蓋澤中有臺也

豬野 在今陝西鎮番衛東北八十里即漢書地理志

所云休屠澤也

流沙 在今陝西嘉峪關外索科鄂模

即居延澤漢志古文以為流沙

以北東至賀蘭山西至廢沙州界幾南北千餘里東西數百里其沙隨風流行隨處有之

三澁 案說文云澁埤增水邊土人所止者王逸注西澁杜預注漳澁或云水涯或云水邊蔡傳以三澁爲水名恐非禹貢錐指云三澁當在清水入漢處一在襄城北卽大堤一在樊城南一在三洲口東皆襄陽縣地在古郢縣之北也

羌夷

萊夷 按蔡傳以萊夷爲今萊州之地然元和志云故

黃城在登州黃縣東南二十五里古萊子國春秋傳曰齊侯滅萊杜注今萊黃縣是今之登州府亦禹貢萊夷地不獨萊州府矣

淮夷 淮夷淮南北近海之夷民今江南淮安揚州二府近海之地皆是

和夷 案水經注引鄭說云和夷和上夷所居之地和卽和川水在今四川雅州榮經縣寰宇記謂榮經縣北九十里有和川水從羅岩古蠻州來也蔡傳以夷爲嚴道今榮經縣以西之夷道非是榮經以西時闌無夷道

書說云巖道以西地名和川夷人所居乃爲得之

崑崙 西戎國蓋附近崑崙山者 案鄭康成云衣皮
之民居此崑崙析支渠搜三山之野者是崑崙析支
渠搜皆本山名而因以爲國號也

析支 今西番在陝西臨洮府河州西應劭曰禹貢析
支屬雍州在河關之西東去河關千餘里羌人所居
謂之河曲羌也唐書党項傳曰党項漢西羌別種其
地古析支東距松州西葉護南春桑迷桑等羌北吐
谷渾

渠搜 涼土異物志云古渠搜國在大宛北界隋書西

域傳云鏐汗國

文獻通考云鏐汗國東去瓜州五百里

都蔥嶺之西

五百餘里古渠搜國渠搜當在西域非朔方也傅寅

禹貢集解云陸氏曰漢志朔方郡有渠搜縣武紀云

北發渠搜是也然考漢朔方之渠搜非此所謂渠搜

此亦當是金城以西之戎也後世種落遷徙故漢有

居朔方者當禹時渠搜居朔方則不應浮積石陸說

非也

甘誓

甘 今陝西西安府鄠縣

本夏虜國秦改虜為鄠

有甘亭元和志

云甘亭在縣西南五里夏啓伐有虜誓師於甘之野

卽此處也

五子之歌

窮 水經注云鬲縣故有窮后國也今山東濟南府德

州北有鬲縣故城是其地

陶唐 鄭康成唐詩箋云唐者帝堯舊都之地今日太

原晉陽是堯始居此後乃遷河東平陽漢晉陽縣今

山西太原府太原縣也 又漢書顏師古注云陶邱

在濟陰

今山東兗州府定陶縣

有堯城堯嘗居之後居於唐故

堯號陶唐氏

按漢書臣瓚注堯初居唐後居陶故曰陶唐師古曰瓚記非也堯不聞有居陶

之事蔡傳仍瓚說以堯初為唐侯後為天子都陶故曰陶唐不可從

商書

商

括地志云商州東八十里商洛縣本商邑古之商

國帝嚳之子契所封也商洛縣今廢今為商州地屬

陝西西安府

仲虺之誥

南巢

南巢今江南廬州府巢縣東北有居巢故城

葛 今河南歸德府寧陵縣西十里有葛城漢書地理

志陳留郡寧陵縣注云故葛伯國今葛鄉是

湯誥

亳 案漢志河南郡偃師縣注云尸鄉殷湯所都又山

陽郡薄縣注云湯所都皇甫謐曰孟子稱湯居亳與

葛為隣葛伯不祀湯使亳眾為之耕葛即今梁國寧

陵之葛鄉也若湯居偃師去寧陵八百餘里豈當使

民為之耕乎亳今梁國穀熟縣後漢改山陽郡亳縣為穀熟屬梁國亳與

薄義同也皇甫謐主穀熟為湯都良是不知偃師亦字異

湯都也張守節史記正義曰湯卽位都南亳

元和志

穀熟縣殷之所

後徙西亳

通典云河南偃師縣亦古亳邑商有三亳成湯居西

亳此卽一也至盤庚又自河北徙都於此

蓋湯未伐桀居南亳後自南亳

遷西亳與葛伯爲隣迺居南亳時事皇甫謐據此以

獻疑固矣穀熟故城在今河南歸德府商邱縣東南

四十里尸鄉在今開封府偃師縣西十里

伊訓

鳴條 鳴條岡在今山西平陽府安邑縣北三十里接

夏縣界括地志云高涯源在蒲州安邑縣北南坂口

卽古鳴條岡是也

太甲上

桐宮 案桐宮湯墓所在元和志云殷湯陵在河中府寶鼎縣北四十三里卽今山西平陽府榮河縣也榮河縣志云殷湯陵在百祥村西元時淪入汾河以石柩遷葬明洪武初建陵寢於其東而江南鳳陽府臺州北相傳有湯陵陵東有桐宮當屬附會

盤庚上

五邦 五邦亳囂相耿殷也亳見湯詒囂史記作傲並

音敖字水經注云敖山上有城卽殷仲丁之所遷秦
置倉於其中亦曰敖倉城敖山在今河南開封府滎
澤縣西北相亦名故殷城括地志云故殷城在相州
內黃縣今屬直隸大名府東南十三里卽河亶甲所築之都
是也耿城在今山西平陽府吉州南隋置耿州於此
以祖乙遷耿爲名史記索隱云祖乙遷於邢邢音耿
近代本亦作耿今河東皮氏縣有耿鄉蔡傳以祖乙
兩遷分耿邢爲二非也殷卽西亳亦詳見湯誥

說命上

傅巖 傅巖在今山西平陽府平陸縣東北二十五里
一名隱賢社水經注云沙澗水出虞山東南逕傅巖
歷傳說隱室前俗名之爲聖人窟孔安國傳傳說隱
於虞號之簡卽此處也

西伯戡黎

黎 黎國今山西潞安府黎城平順二縣地括地志云
故黎城黎侯國也在潞州黎城縣東北十八里尚書
云西伯戡黎是也

微子

微 孔安國傳微圻內國名寰宇記云微子城在潞東
北今山西潞安府潞城縣東北十五里有微子鎮卽
故城也

周書

周 史記正義曰太王所居周原因號曰周文王因之
有岐城亦名周城在今陝西鳳翔府岐山縣

牧誓

牧

牧一作母

孔傳云紂近郊三十里地名牧括地志云

今衛州城卽殷牧野之地周武王伐紂築也水經注

云霍水東南歷毋野自朝歌以南暨清水土地平行
據臯跨澤悉毋野矣 案紂都妹土在朝歌北隋置
衛縣於此唐武德時爲衛州治卽今之淇縣也牧野
當在今淇縣南迤邐以至汲縣故九域志謂汲城亦
牧野之地也

庸 杜預云今上庸縣上庸今湖廣鄖陽府竹山縣是

蜀 正義云大劉以蜀是蜀郡今四川成都府是

羌 正義云蜀都分爲三羌在其西故曰西蜀蘇氏云
先零枹罕之屬當在今陝西甘肅以西南接蜀漢塞

外也

鬃微 正義云孔傳鬃微在巴蜀者巴在蜀之東偏漢之巴郡所治江州縣也江州縣今巴縣北屬四川重慶府

盧 古盧戎國今湖廣襄陽府南漳縣東北中盧故城是文十六年左傳楚伐庸自盧以往杜預云盧楚邑今中盧縣水經注云沔水過中盧縣東縣卽春秋盧戎之國也

彭 正義云在東蜀之西北蘇氏曰屬武陽縣有彭亡

武陽今四川眉州州北廢彭山縣有彭亡城是其地也

濮 案左傳文十六年庸人麇人率百濮伐楚疏孔安國云庸濮在江漢之南是濮爲西南夷也釋例曰建寧郡南有濮夷無君長各以邑落自聚故稱百濮建寧故城在今湖廣荊州府石首縣其地要在石首之南也

武成

周 蔡傳云周鎬京也鎬京在今陝西西安府長安縣

南三十里三輔決錄云鎬在豐水東豐在豐水西相
去二十五里自漢武帝穿昆明池於此鎬京遺址淪
陷焉

豐 豐邑在今陝西西安府鄠縣東史記文王伐崇侯
虎而作豐邑是也

桃林 今陝西潼關衛東南有牧牛山按河南閩鄉縣
界亦名夸父山山海經夸父山北有林焉名曰桃林
水經注云湖水出桃林塞之夸父山武王伐紂天下
既定散牛桃林卽此處也

比干墓 在今河南衛輝府汲縣北十里

鹿臺 亦名南單臺在今衛輝府淇縣括地志云鹿臺
在衛輝西南二十二里是也

鉅橋 在今直隸廣平府曲周縣東北通典云洺州曲
周縣紂巨橋倉在此今河南衛輝府淇縣東北十五
里亦有鉅橋非也

洪範

箕 蔡傳國名姓纂云商之圻內僖三十三年晉敗狄
於箕者杜預云太原陽邑有箕城在今山西遼州榆

社縣東南三十里

金滕

管 管國今河南開封府鄭州括地志云鄭州管城縣外城古管國城也周武王弟叔所封

微子之命

東夏 蔡傳云宋亳在東故曰東夏今河南歸德府商邱縣宋微子所封以爲湯後也

康誥

東洛國 洛有王城有成周王城在今河南河南府洛

陽縣西五里括地志云故王城一名河南城本邲鄘
周公新築在洛州河南縣北九里苑內東北隅自平
王以下十二王皆都此至敬王乃遷都成周至赧王
又居王城也成周在今洛陽縣東三十里洛誥所謂
我卜瀍水東亦惟洛食者也又名下都周遷殷頑民
於此史記正義云東周古洛陽城也括地志云洛陽
故城在洛州洛陽縣東北二十六里周公所築卽成
周城也

酒誥

妹邦 今河南衛輝府淇縣北有妹鄉孔傳云妹紂所
都朝歌以北是也

洛誥

黎水 蘇氏曰黎水今黎陽也續文獻通考云衛河淇
水合流至黎陽故城爲黎水亦曰濟水黎陽故城在
今直隸大名府濬縣東北

多士

奄 奄國在今山東兗州府曲阜縣境括地志云兗州
曲阜縣奄里卽奄國之北也

君奭

號

漢書地理志有三號北號在大陽

山西平陽府平陸縣東北有大

陽故城

東號在滎陽

今河南開封府滎澤縣

西號在雍州韋昭云

西號號叔之後在鎬京畿內今陝西鳳翔府寶雞縣有號縣故城

蔡仲之命

蔡

蔡國今河南汝寧府上蔡縣縣西南十五里有故

蔡城杜預云武王封叔度於汝南上蔡至平侯徙新

蔡昭侯徙居九江下蔡也

霍 霍國今山西平陽府霍州州西南十六里有霍城
地理通釋云霍姬姓文王子叔處所封

立政

三亳 按蔡傳云三亳蒙爲北亳穀熟爲南亳偃師爲
西亳今河南歸德府商邱縣北四十里有大蒙城水
經注云汲水東經大蒙城北疑卽蒙亳也所謂景亳
爲此亳矣南亳西亳詳見湯誥

君陳

東郊 東郊卽下都詳見康誥

顧命

芮 孔傳云周同姓圻內之國杜預云馮翊臨晉縣芮鄉今陝西西安府朝邑縣有南芮鄉北芮鄉古芮伯國也

彤 案胡三省通鑑注彤伯之國當在鄭縣界鄭縣今陝西西安府華州西南有彤城

畢 杜注云在長安縣西北長安今屬陝西西安府衛 今河南衛輝府淇縣

毛 路史云毛伯國上邽藉水旁有毛泉上邽今陝西

鞏昌府秦州地 案毛泉見水經注亦未言卽毛伯
之國路史不知何據今毛地未知確在何所姑存其
說

齊 史記武王封師尚父於齊都營邱正義云營邱在
青州臨淄北百步外城中今山東青州府臨淄縣西
北三里有營邱城是也

費誓

費 孔傳云費魯東郊地名蘇氏云費在東海郡後爲
季氏邑季氏之費邑今山東兗州府費縣西北二十

里有故城是孔安國謂魯東郊地則是今曲阜縣境
未詳所在

徐戎 案孔安國傳徐戎徐州之戎括地志云大徐城

在泗州徐城縣北三十里古之徐國也

括地志又以徐國卽淮夷

非是徐城縣今廢爲江南鳳陽府泗州

魯 史記武王封弟周公旦於曲阜曰魯括地志云兗


州曲阜縣外城卽周公旦子伯禽所築古魯城也曲

阜縣今屬山東兗州府

秦誓

秦 周孝王封非子於秦因爲國號今陝西鞏昌府秦
州也

尚書地理今釋終



編主五雲王

編初成集書叢

釋今理地書尙

中華民國二十五年十二月初版

撰者 蔣廷錫

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

◆D六一五九



3
4
3045